

फिलेमोन क पत्र

ईसू मसीह क बरे बन्दी बना पौलुस अउर हमार भाई तीमुथियुस कइँती सः

हमार प्रिय दोस्त अउर सहकर्मी फिलेमोन, हमार बहिन अफफिया, हमार साथी सैनिक अर्खिप्पुस अउर तोहरे घरे पर एकट्ठा होइवाली कलीसिया कः

उउ हमार परमपिता परमेस्सर अउर पभू ईसू मसीह कइँती स तोहे पचन क अनुग्रह अउर सात्ति मिलइ।

फिलेमोन क प्रेम अउर बिसवास

4आपन पराथना में तोहार उल्लेख करत भए मई हमेसा अपने परमेस्सर क धन्यवाद करत हउँ। 5काहेकि मई संत जनन बरे तोहरे ओई प्रेम अउर बिसवास क चर्चा सुनत हउँ, जो पभू ईसू अउर समस्त पवित्तर लोगन क प्रति अहइ।

6मोर पराथना बा कि तोहरे बिसवास स पइदा उदार सहभागिता लोगन क मार्ग दरसन करइ। जेहसे ओन्हे सभन अच्छी चीजन क गियान होइ जाइ जउन मसीह क उद्देश्य क आगे बढ़ावइ में हमरे बीच घटन होत रहिन बाटिन। 7हे भाई, तोहार कोसिसन स संत जनन क हिरदइ हरा-भरा होइ ग हयेन, इही बरे तोहरे प्रेम स मोका बहुत आनन्द अउर प्रोत्साहन मिला बा।

उनेसिमस क भाई स्वीकारा

8इही बरे मई बिसवास करत हउँ कि मसीह में मोका तोहरे कर्तव्यन क बारे में हुकुम देइ क अधिकार बा 9मुला प्रेम क आधार प मई तोहसे निवेदन करब ही ठीक समझत हउँ। मई पौलुस जउन अब बूढ़ाइ होइ चला हउँ अउर मसीह ईसू क बरे अब भी बंदी बना हुआ हउँ। इही उचित अहइ कि तोहसे सबन स आग्रह करउँ।

10मई उ उनेसिमस क बारे में निवेदन करत हउँ, कि जउन जब तब मोर धरम पुत्र बना रहा जेकर मई बंदी गृह में रहेउँ।

11एक समइ रहा जब उ तोहरे कउनउ काम क नाहीं रहा, मुला अब न केवल तोहरे बरे बल्कि मोरे बरे भी उ बहुत काम क अहइ। 12मई ओका फिन स तोहरे लगे भेजत हउँ (बल्कि मोका तउ कहइ चाही अपने हिरदइ क

ही तोहरे लगे भेजत हउँ) 13मई ओका इहाँ अपने लगे ही रखइ चाहत रहेउँ, ताकि सुसमाचार क बरे मोह बन्दी क उ तोहरी तरफ स सेवा कइ सकइ।

14मुला तोहरी आज्ञा क बिना मई कछू भी करइ नाही चाहित ताकि तोहार इ भलाई दबाव स नाही बल्कि स्वेच्छा स ही होइ।

15होइ सकत ह कि ओका थोड़े समइ क बरे तोहसे दूर रहइ क कारण इहइ होइ कि तू ओका फिन हमेसा बरे पाइ ल्या। 16दास क रूपे में नाहीं, बल्कि दास स जियादा एक प्रिय बन्धु क रूपे में मई ओसे बहुत प्रेम करत हउँ किन्तु तू ओका अउर जियादा प्रेम करब्या। केवल एक मनुष्य क रूप में ही नाहीं बल्कि पभू में स्थित एक बन्धु क रूपे में भी।

17तउ यदि तुम मोका आपन दोस्त क रूप में स्वीकार करत ह, तब उनेसिमस क वापस स्वीकार कइ ल्या। ओकर ऐसा सुआगत करा, जैसा कि तुम मोर सुआगत किहा ह।

18अउर अगर उ तोहार कउनो प्रकार स हानि पहुँचाएस अथवा कउने वस्तु बरे तोहार कर्जदार अहइ। तउ ओका हमरे खाता में लिख द्या।

19मई पौलुस खुद आपन दस्तखत स इहइ लिखत हउँ। ओकर भरपाई तोहका मई करबइ। (मोका इ बतावइ क जरूरत नाहीं बा कि तोर सम्पूर्ण जीवन ही मोर ऋणी बा।

20हाँ भाई मोका पभू में तोहसे इ लाभ पहुँचइ कि मसीह में मोर हिरदय हरा भरा होइ जाइ। 21तोह पइ बिसवास रखत इ चिट्ठी मई तोहका लिखत हउँ। मई जानत हउँ कि तोहसे मई जेतना कहत हउँ, तू ओसे कहुँ जियादा करब्या।

22साथ ही मैं मोरे बरे निवास का भी प्रबन्ध करा, काहेकि मोर आसा अहइ कि तोहार सब पराथना क परथनावन द्वारा मई तोहका सौंप दिया नाउँ।

अन्तिम उपहार

23मसीह ईसू में रहई क मोर साथी बन्दी इफ्रास क तोहे सबन क नमस्कार। 24मोर साथी कार्यकर्ता मरकुस, अरिस्तर्खुस, देमास अउर लूका क तोहे नमस्कार पहुँचइ। 25पभू ईसू मसीह क अनुग्रह तोहरे आतिमा क साथ रहइ।